

Begrüessig

Text: Jacob Stickleberger
Musik: Georges Brassens

August 2003

Begrüessig

- Jitz gani mit euch über d'Büecher
warum isch es nümme wi früeher?
begrüessi e Frou isch's ke Frag
i säge're schlicht guete Tag
schön guete Tag
doch z'mal heisst es plötzlech lut Knigge
di bessere Lüt und di Schigge
die schüttle das sig jitz galant
bim guete Tag säge no d'Hand
schüttle no d'Hand
- I la mi dür d'Mode la chnüttle
und fah bi're Frou afa schüttle
ergänzend zum gwönleche Gruess
d'Hand vo're wil me das mues
wil me das mues
scho das findi liecht übertribe
doch nid mal bi däm isch es bilbe
zum Gruess ghöri neuschters e Kuss
und scho wider hani Verdruss
hani Verdruss
- Begägn'ere Frou mues i wüsse
zersch grüesse de schüttle de küsse
i finde das sehr kompliziert
i gheie scho drus si mer z'viert
si mer mal z'viert
s'längt immer no nid für ds Begrüesse
zwe Küss die si bald schon es Müesse
und hützutags si mer - ja nei
für ds Grüesse bi Kuss Nummer drei
Kuss Nummer drei
- Chum ha mi dür euch düregschmatzet
chunt ds nächschte Problem wo mi chratzet
bim Adjö sägen und Gah -
faht ds Eländ grad non emal a
non emal a
wi chunt das ir Zuekunft no use?
ds Begrüesse wird langsam es Schmuse
und ändet i weis hüt scho wo -
so wyt wird das einisch no cho
so wird das cho

August 2003